

AKASHVANI AIZAWL

REGIONAL NEWS BULLETIN

Date – 27/04/2025 Time - 18:30 -18:40Hrs

HEADLINES (EVENING)

- Lunglei MZP Headquarters huaihawta naktuk zing dar 7 atanga Aizawl-Thenzawl-Lunglei kawngpui dan tum chu kaltlangpui tum ani.
- Mizoram Universal Health Care Scheme (MUHCS) hnuai-ah kal karta Nilaini thleng khan cheng nuai 73, sing 3 leh 614 pek chhuah a ni tawh.
- Prime Minister Narendra Modi-a'n Pahalgam-a a firfiaka chetna thlenga a mawhphurtute chu an phu tawkin chhan let a ni ang, a ti.
- Canada parliament thar din turin naktukah an ram mipuiten vote an thlak dawn.

<><><>

ATL ROAD STIR

Lunglei MZP Headquarters huaihawta naktuk zing dar 7 atanga Aizawl-Thenzawl-Lunglei kawngpui dan tum chu kaltlangpui an tum.

MZP leh a thlawptute hian Pukpui-ah lirthei lut leh chhuak tur dan an tum a. MZP te hian ATL Road siamna tur cheng vbc 90 leh nuai 69 chu ATL Road siamna'n hman vek ni se an ti a. He tih lai hian cheng Vbc 45 leh nuai 60 chauh dah niin Mauseh leh Pukpui (km 14) chin chauh siamna'n Sorkar in a dah chu an hriatthiam loh thu leh, pawtpeng lovin a vaiin ATL Road siamna'n hman ni rawh se tiin sorkar an phut a. A bang zawng Aizawl khawpui chhung kawngpui chhe thawmthatna atana hman tura pawhpen ni a sawi chu an duh loh thu an tarlang bawh a ni. MZP te hmalakna hi Lunglei mipui tam ber pawhin an thlawp a, Maxi-Cab Service te pawhin thlawpin Lunglei atanga Aizawl pan ten tlan loh an tum a, Aizawl to Lunglei service te pawhin tlan an tum lo.

Hetianga a nih avang hian maxicab ticket pek chhuahnate pawhin Thawhtanni chhuak tur ticket an pe chhuak lo tih an sawi a. Anni bakah hian Lunglei Thalai Pawl, Chhimbial Chhantu, Hnahthial Thalai Pawl, Tlabung to Lunglei-Aizawl-Silchar Maxicab Service te pawhin thlawp in tlan loh an tum thu an puang ni a thu dawn a ni a. Chawngte khua a pawl hrang hrang 11 intelkhawm, Joint NGO's Chawngte te'n ATL Road siamna tur sum pawhpen dahlet a nih theih na'na MZP Hqrs Lungleiin Thawhtanni atanga ATL Road dan chah nise an tih chu, an thlawp tlat tih an puang ve leh bawh.

Sorkar lam atangin leh district bawrhsap pisa lam atang pawhin kawng dan tur hi a hranpa a ti tawp tur a ngenna an dawng lo tih MZP te chuan sawiin a bultan na'n kawng hi dan phawt a ni ang a, a hnu leh zel chu a tul dan angin kalpui a ni ang an ti.

Hetihlai hian PWD hotu thenkhat chuan cheng vaibelchhe 90 leh nuai 69 hi Hmuifang PWD division huamchhung a Contractor Bagharetha Engineering Ltd. te hnathawh that loh vanga an dahkham an chawi leh a pung a ni a, Lunglei ta bik a ni lo an ti a. A nihna takah chuan cheng Vbc 45 leh nuai 60 pawh hi Mausen to Pukpui siam na'n pawhluh zawk a ni an ti.

Heih lai vek hian rorellai ZPM Southern Headquarters, Lunglei chuan ATL Road chungchangah chhim lam mipuite rilru natna chu awm an tih thu leh mipui rilru damna tur thutlukna sorkarin a siamsak hma chuan an party pisa-ah hna engmah thawh rih loh ni se an ti a, party pisa hawn pawh an hreh hle tih an tarlang.

ZPM Southern Headquarters nimina extended elected office bearers thukhawm chuan Aizawl-Thenzawl-Lunglei (ATL) road siamthat hna chu a rang thei ang bera lang thei a hna tan nghal turin sorkar an phut tih an sawi a, tun hnaiah budget pawn lam atanga hun hmasa lama ATL Road kaihnawih sum hmuhlet lehte pawh chief minister in he kawng siamna atana hman a lo remtihsak tawh ang ngeiin chhim mipuite beiseina ang hian ATL road siamna tur hian ruahman sak leh nghal turin sorkar an phut a ni.

Hemi hma April ni 7 khan Lunglei West bialtu MLA leh ZPM Southern Hqtrs-in ATL Road bik enkawl tur a an dah Pu T. Lalhlimpaia chuan ATL kawngpui hi ZPM Southern Hqrs anga a mawhphurhna a nih angin sorkar hian an siam dawn lo a nih chuan MLA atanga chawlh a hreh loh thu Lunglei leh chhim mipuite'n hriatpui a duh thu an Party chhung inkhawmah a lo sawi tawh a ni.

(Thangmingliana Renthlei, PTC Lunglei/Corr)

<><><>

PASTORAL CONF.

Zirtawpni atanga Mizoram Presbyterian Kohhran bial hrang hrangah bial inkhawmpui chu zanin hian a tiak ang

Zirtawpni chhun lamah Finance Committee leh Nomination Committee an thu a, zanah Palai Lawmna bakah Report ngaihthlak a ni. Nimin khan rorel a ni a, nizan khan vantlang Pathian biak inkhawm hun hman a ni. Vawiin Pathianni chawhma leh chawhnu khan vantlang Pathian biak inkhawm hun hman a ni a. Chawhnu inkhawmah Lalpa Zanriah Sakramen theh a ni a. Zanin inkhawmah vantlang Pathian biak inkhawm bakah bial chairman kalchhuak turte'n Sermon hnuhnung an sawi ang. Pathian Biak Inkhawm hun hrang hrangah thupui sawi tura ruatten thuchah an sawi bawk a ni.

<><><>

MOURNING

April ni 21 a thi Catholic kohhran hruaitu lu Pope Francis chu tunkar Nilaini thleng khian Mizorama Catholic kohhran mite pawhin an sun dawn.

Pope Francis hi Catholic kohhran mite chuan Pope thi dang ang bawkin ni kaw chhung an sun dawn tih Aizawl Bishop Most Rev. Stephen Rotluanga'n kal kalta Thawhlejni khan a lo puang tawh a. 'Novemdiales' ti a an vuah, ni kaw chhung Pope Francis sun hun chhung hian an kohhran zirna in leh biak-inah te chuan zirna in puanzar leh Vatican puanzarte chu a ngul chanve a zar tur a ni dawn a. Hemi hun chhung zawng hian Catholic kohhran mite chu nitin Pope kal ta pual hian tawngtaina

(rosary) hlan tura beisei an ni. Kum 1936 a piang Pope Francis hi miretheite tana thawk leh a ngaihdan tlang taka sawi thin a nih avanga 'Mipuite Pope' ti hiala sawi thin a ni.

Hetih lai hian nimin khan Vatican khawpui a Pope Francis vuina hun laiin Aizawl Kulikawn a Christ the King Cathedral biak-inah Pope kal ta pual hian hun hman a ni a. Aizawl Bishop Most Rev. Stephen Rotluanga chuan a bik taka ruahman Requiem Mass chu a theh a. He hunah hian beisei an nih angin puithiamte, rawngbawltu leh kohhran mi tam tak pungkhawmin Pope hi an thlah a ni.

Aizawl a awm ve thei lote tan Catholic tualchhung kohhran (parish) hrang hrangah puithiamte chuan sakramen thianghlim hi an buaisaih bawk a ni



BCM

Vawiin hi Baptist Church of Mizoram (BCM) ni pawimawh Buhfaitham Pathianni a ni a, he ni hi BCM hnuai Tualchhung Kohhran hrang hrangah hman a ni.

Baptist Kohhran thuchhuah tarlan danin Buhfaitham Pathianni pual hian thupui intawm - “Lalpa Krista rawng in bawl a nih hi” tih chu hman a ni a. Chawhma inkhawmah thuchah sawitu-in thupui thlansa hmangin thuchah an sawi bakah Buhfaitham chanchin inhrilhna hun hmangin, tualchhung kohhran Buhfaitham report te ngaithla-in infuihtharnate hun an hmang bawk.

BCM Finance Department-in a tarlan danin kum 2024-2025 tangka kum chhunga Buhfaitham atanga Baptist kohhran sum hmuh zat chu a vaiin cheng vaibelchhe 11, nuai 89, sing 8 leh 949 a ni.



MUHCS

Mizoram Universal Health Care Scheme (MUHCS) hnuai-ah kal kalta Nilaini thleng khan cheng nuai 73, sing 3 leh 614 pek chhuah tawh a ni.

Health minister Pi Lalrinpuii sawi danin pawisa pe lawk lo (cashless) hmanga MUHCS kalpui mekah hian damlo 964 hnenah cheng nuai 73 chuang enkawlna senso hi damdawi-in 36 hnenah pek chhuah a ni tawh a. Damdawi-in 36 zinga 2 tih loh chu sorkar damdawi-in vek a ni a. Zoram Medical College & Hospital hnenah damlo enkawlna senso pek chhuah tam ber a ni a, cheng nuai 29, sing 9 sang 6 chuang pek a ni a. Zemabawk a Mizoram State Cancer Institute-in dawtin damlo enkawlna senso atan cheng nuai 12 leh sang riat pek chhuah tawh a ni a, Aizawl Civil hospital hnenah cheng nuai 10 leh sang 7 chuang pek chhuah a ni tawh bawk a ni.

April ni 1 atanga hman tan tura a hma a chief minister Pu Lalduhoma’n a lo puan tawh MUHCS hnuai a pawisa pek chhuah hi chawlhkar khat dan velah a hlawma pek chhoh zel a ni a. Hetih lai hian Mizorama mimal leh kohhran enkawl damdawi-in tam ber chuan an zawm duh rih lova, tuna sorkarin a tih dan medical reimbursement a kal rih phawt an duh thu thlenin sorkar nen an indawr mek a ni.

Hetih lai hian Mizoram sorkar hnuai a hnathawk pawl inzawmkhawm, Federation of Mizoram Government Employees & Workers pawhin he healthcare scheme zawm tura sorkarin a ti chu an duh loh thu an thlen tawh thin a. Sorkarin a tih luih zel chuan court thlenga kal an tum thu an sawi a ni.

<><><>

MBOCWWB

Labour Employment Skill Development and Entrepreneurship Department (LESDE) hnuai scheme hrang hrang kalpui mekah, hamthatna hrang hrang mipui tan a awm.

LESDE hian mipuiin an chhawr tangkai theih tur scheme hrang hrang an kalpui zingah e-Shram portal chu mahni kut ke a eizawng, unorganized workers te'n hamthatna an dawn theihna tura siam a ni a, tun dinhmunah mi 65000 chuang an iniziaklut tawh a, he portal-a iniziak lut te hi kum 60 an tlin hunah thla tin pension cheng Sang 3 an hmu thei anga, accident avanga ramtui lei lo a an awm a nih chuan PMSBY atangin Cheng Nuai 2 thleng an dawng thei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MANN KI BAAT

Prime Minister Narendra Modi-a'n Pahalgam-a a firfiaka chetna thlenga a mawhphurtute leh inhnawmawhte chu an phu tawkin chhan let a ni ang, a ti. Akashvani-a vawiina Mann Ki Baat hun a hmanna-ah he thu hi sawiin tun thla ni 22-a Pahalgam-a firfiaka chetna thleng chuan a riltu a tina takzet a ni, a ti a, Kashmir-a muanna a awm leh ta te, democracy nghet lehzual din a ni leh ta leh tunhma zawng aia zin mi an thahnem chho leh ta te chuan India leh Jammu & Kashmir hmelmate a ti lawmlo a ni, a ti.

<><><>

CANADA ELECTIONS

Canada parliament thar din turin naktuk hian an ram mipuiten vote an thlak dawn a, vote nei mi maktaduai 28 awmin House of Commons-a member tur mi 343 an thlang dawn a ni. Seat 172 la thei party mal emaw tangrual pawlin sorkar thar an siam ang.

Hetih lai hian, Canada khawpui pakhat, Vancouver-ah nimin khan Philippine mite kut pakhat, Lapu Lapu Filipino Festival-a tel, mipui pungkhawm zingah car pakhat tlan lutin mi engemawzat a chil hlum a, midang engemawzatin hliam an tuar

bawk. Car khalhtu hi man a ni tawh a, he thil thleng hi tih luih nge tih palh tih chhui mek a ni.

